

大寶積經

第二十四

七十四
師十

47528



Large stylized seal script characters, likely a library or collection stamp, partially overlapping the dragon illustration.

佛
山
增
輝
轉
常
轉
置
法
金
剛
院
置

元
禧
九
年
丙
子
二
月
三
日
重
脩

王
國
集
固
帝
府
綴
昌

Small handwritten characters and marks at the bottom of the page, including a large '子' character and other illegible marks.

大寶積經卷第二十

師

大唐三藏菩提流志奉 詔譯

不動如來會第六之二

菩薩眾品第四



今時尊者舍利弗作如是念世尊今者已說
聲聞功德復願說諸菩薩具足功德何以故
一切功德從此出生今時世尊知其所念告
舍利弗彼佛刹中有無量百千億諸菩薩眾
皆來集會所有出家菩薩以佛神力隨所聽
聞皆能領悟受持讀誦舍利弗我於此界說
法至少比不動如來所說法藏百分千分百
千分億百千分算分數分迦羅分部波尼殺

曇分亦所不及舍利弗此皆不動如來應正
等覺修菩薩行時發如是願願我成佛彼刹
土中所有菩薩以我威力隨所聽聞皆能領
悟受持讀誦舍利弗是諸菩薩由彼如來本
願神力於佛所聞悉能領受諷誦通利復次
舍利弗若彼菩薩自心欲樂往異佛土舉心
便至形服言音善同方俗於彼如來禮拜供
養聽聞正法善為問難能事已周還歸佛所
舍利弗此賢劫中有九百九十六佛當出於
世若有菩薩樂見此如來者應願生彼不動
佛刹舍利弗若善男子善女人從此佛刹及
餘佛刹於命終後若已生若今生若當生不

動如來佛刹中者必不信任諸聲聞地何以
故彼行佛道常遇如來天魔波旬不得其便
於二乘地永斷相續必定當得無上菩提常
在如來諸大集會舍利弗汝應當知若住不
動如來清淨佛刹者彼諸衆生終不退墮不
可引攝亦不退還任無上菩提有大勢力不
可搖動永無退轉舍利弗若有善男子善女
人於此世界或他世界若命終後生於彼土
即於生時得如是念我已入如來室任無畏
城舍利弗彼諸菩薩所有言議皆與般若波
羅蜜相應互相遵敬起導師想復次舍利弗
彼佛刹中諸菩薩衆在家者少出家者多皆

以佛神力隨所聽聞即能領悟受持諷誦舍
利弗若在家菩薩摩訶薩雖不繫念於法會
中隨在方所若坐若立以佛神力皆能聽聞
領悟受持讀誦通利彼出家菩薩亦復如是
諸在異方乃至諷誦無別是諸菩薩捨身受
身於所聞經終不忘失於諸佛土隨願受生
舍利弗彼亦是不動如來本願功德之所莊
嚴舍利弗若菩薩於一生中欲見無量百千
億那由他諸佛者應當願生不動如來之所
若菩薩於彼生已即見無量諸佛種諸善根
復能為無數百千衆生演說法要令諸衆生
增長善根舍利弗此賢劫中諸佛世尊當出

於世若諸菩薩以衣服飲食卧具醫藥種種
資具供養如來便即出家既出家已於諸佛
所淨修梵行以此善根方餘菩薩於不動如
來之所於一生中與波羅蜜相應所有福聚
百分不及一百分不及一算分迦羅分數分
喻分鄔波尼殺曇分亦不能及舍利弗此亦
不動如來清淨佛刹功德莊嚴舍利弗若有
菩薩從此世界或餘世界於壽終後若已生
現生當生不動如來佛刹者一切皆得不退
轉位何以故彼佛刹中天魔波旬不為障礙
亦無魔業之所嬈亂舍利弗譬如毒蛇神呪
所伏不能為害一切諸蟲見彼毒蛇亦無憂

懼然此毒蛇雖無毒害由本業故受此蛇身
故名毒蛇舍利弗彼魔波旬亦復如是由不
動如來往修菩薩行時本願善根如是迴向
願我當證無上菩提調伏諸魔不為障惱彼
諸菩薩聲聞凡夫乃至三千大千世界亦不
為障惱然由先業所感受此魔身生彼天中
而自悔責無始故業獲此身名雖得自在常
生厭患於彼如來說法之時諸魔眷屬常預
聽聞聞已心淨於聲聞眾而生愛樂云何當
得住於寂靜少欲知足彼諸魔眾常起出家
之心而無障礙之想故彼國中聲聞菩薩及
凡夫眾皆由彼佛往督精勤弘誓威力得安

樂住舍利弗此亦不動佛刹殊勝莊嚴時舍
利弗白佛言世尊若有善男子善女人以七
寶滿三千大千世界持用布施願生彼國由
茲行願此善男子善女人終不退墮聲聞辟
支佛地從一佛刹至一佛刹歷事供養諸佛
如來於諸佛所聽聞正法雖未證得無上菩
提而能見彼無量百千乃至億那由他百千
諸佛於諸佛所種諸善根世尊若善男子善
女人由此方便以七寶滿三千大千世界持
用布施由茲善捨往生彼國佛告舍利弗如
是如是彼善生善往如是諸菩薩摩訶薩滿
彼刹中舍利弗譬如金礦精加鑄鍊除去砂

礫唯有真金造諸飾好嚴身之具舍利弗彼
佛刹中菩薩摩訶薩住於真實亦復如是然
彼菩薩摩訶薩清淨集會汝今應知復次舍
利弗彼佛刹中所有菩薩若已生若現生若
當生如是菩薩皆行一行所謂住如來行舍
利弗云何如來行所謂超過聲聞辟支佛地

言行一行者是彼假名是故舍利弗若菩薩
摩訶薩樂行一行者應當願生彼佛刹土舍
利弗我所授記得不退轉菩薩摩訶薩此輩
應生不動佛所舍利弗是諸菩薩生彼佛刹
者我不捨離譬如刹利灌頂大王有敵國來
欲侵財位王既聞已作是思惟我之妃后愛

子不堪禦敵及諸財寶收入宮城不爲怨敵之所侵害王之國祚安靜無虞威震強敵不憂災難舍利弗我不捨離諸菩薩者亦復如是如彼王之寶物愛子妃后修菩薩行者應如是知彼佛刹中無有畏懼猶如宮城彼敵王者即魔波旬於菩薩行人難爲障礙如彼灌頂大王不被怨敵之所侵擾如來亦復如是不爲天魔之所擾惱舍利弗譬如有入畏於債主遠適邊國不爲債主及於他人之所陵奪何以故由路遠險絕債主家人不能達彼彼諸菩薩生妙喜國者波旬路絕亦復如是舍利弗此三千大千世界天魔波旬常爲

菩薩聲聞作諸障礙妙喜刹中諸天魔衆不
爲魔業彼諸菩薩若已生現生當生常無恐
怖何以故由彼如來本行菩薩道時所有善
根如是迴向我證無上正等覺時彼天魔衆
不爲障惱及作魔事舍利弗譬如丈夫善服
毒藥能使消化方爲食事無有諸毒彼刹天
魔亦復如是常加利益不爲損害舍利弗彼
佛刹土成就如是無量功德尔時舍利弗作
是思惟我今欲見彼佛世界不動如來應正
等覺及聲聞衆尔時世尊知舍利弗心之所
念則以神力不起于座皆令得見告舍利弗
言汝今見不答言已見佛告舍利弗汝見彼

諸天人微有勝劣殊異相不答言不見何以
故我見妙喜國人衣服飲食及諸珍玩皆是
諸天樂具彼不動如來處衆說法猶若金山
光明赫弈諸聲聞衆無量無邊譬言如有人遊
於大海中流四望涯際莫知觀彼聲聞亦復
如是是諸聲聞隨所聽法身心不動如入禪
定匪如此界入定之人時或搖動世尊若善
男子善女人以七寶滿三千大千世界持用
布施由茲善捨彼諸菩薩善得往生妙喜世
界何以故彼亦如是得不退轉世尊譬如王
使遠適他國執持符印經途來往關防主司
莫能爲礙何以故以王印力人無遮止彼諸

菩薩摩訶薩亦復如是或從此界若他世界
壽命終後於彼佛刹若已生若現生若當生
皆不退轉於阿耨多羅三藐三菩提從一佛
刹至一佛刹常不遠離諸佛世尊皆當速證
無上菩提時舍利弗復白佛言世尊彼界所生
菩薩摩訶薩與此世界預流果人無有差別何
以故如預流果人不墮惡趣彼界菩薩若已
生現生當生亦皆斷諸惡趣及聲聞辟支佛
地乃至未證無上菩提從一佛刹至一佛刹
不離諸佛及聲聞衆佛告舍利弗如是如是
是諸菩薩摩訶薩受生彼國不墮聲聞辟支
佛地乃至未證無上菩提從一佛土至一佛

土常得現前供養諸佛及當證得佛菩提果
舍利弗譬喻如預流果人決定當得聲聞菩提
終不墮惡趣是諸菩薩亦復如是或從此世
及以他世命終之後受生彼刹彼皆決定當
證阿耨多羅三藐三菩提從一佛刹至一佛
刹於諸佛所常不遠離阿耨多羅三藐三菩
提時舍利弗復白佛言世尊於此世界所有
一來向及一來果乃至住阿羅漢向及羅漢
果與彼佛刹所生菩薩摩訶薩等無有異佛
告舍利弗汝勿作此言何以故於此佛刹菩
薩摩訶薩佛授記者與彼所生菩薩等無有
異復次舍利弗於此世界坐道場菩薩與彼

所生菩薩等無有異何以故彼諸菩薩行如
來行不爲天魔之所得便於二乘地永斷相
續從一佛刹至一佛刹常能供養一切如來
乃至證得無上正覺尔時阿難作如是念我
今應察長老須菩提辯才之力作是念已白
須菩提言我等應觀不動如來及聲聞衆兼
彼佛土時須菩提告阿難言汝欲見彼如來
者今應且觀上方尔時阿難觀上方已白須
菩提言我極觀上方皆空寂靜須菩提言彼
不動如來諸聲聞衆及彼佛土亦復如是如
見上方尔時舍利弗白佛言世尊如佛所說
此世獲記菩薩與彼所生菩薩等無有異世

尊我今不知以何為等佛告舍利弗以法界等故得無有異

涅槃功德莊嚴品第五

爾時尊者舍利弗復作是念世尊已說不動如來應正等覺修菩薩道功德無邊又說彼土及聲聞菩薩殊勝德業廣大莊嚴復願世尊於茲開示彼佛滅度化迹如何爾時世尊知舍利弗心之所念告言舍利弗不動如來般涅槃日化身分布一切世界於地獄中說諸妙法以法調伏無量有情皆當證得阿羅漢果然此時獲果方滅度前證無學人轉增其數即於此日授香象菩薩摩訶薩記云汝

於我滅度後當得作佛号白金蓮如來應正
等覺復次舍利弗彼金蓮如來佛刹功德聲
聞衆數與不動如來等無有異復次舍利弗
不動如來入般涅槃是時大地普皆震動一
切三千大千世界震吼發聲其聲上徹乃至
阿迦尼吒天諸天間已即知彼佛入於涅槃
復次舍利弗彼佛刹中所有叢林及諸藥草
皆悉傾向不動如來涅槃之處是時天人悉
以華鬘雜香及諸衣服而散佛上所散香華
周匝圍遶高一由旬復次舍利弗彼涅槃時
三千大千世界所有天龍夜叉乾闥婆阿脩
羅迦樓羅緊那羅摩睺羅伽等皆向不動始

來人掌作禮他方諸天以佛神力悉皆得見
入般涅槃其諸天人經七晝夜心懷悲惱不
受人天嬉戲娛樂亦無欲想互相謂言不動
如來為世光顯作衆生眼令取滅度一何速
哉舍利弗若菩薩摩訶薩從此世界或餘世
界於命終後生彼佛刹若現生彼皆得授阿
耨多羅三藐三菩提記非可以百數而數彼
以千數及百千數舍利弗是百千菩薩摩訶
薩數者應知入如來數皆入佛數皆入佛數
入一切智性數若有菩薩摩訶薩當生彼刹
者亦皆得入如來等數舍利弗除彼不退菩
薩摩訶薩所餘菩薩於此世界若不聞稱讚

不動如來功德法門。若皆為惡魔之所攝受。復次舍利弗。不動如來。般涅槃後。乃至正法住世。彼佛刹中所生菩薩摩訶薩。亦當入其數。所以者何。由彼如來本願力故。是諸菩薩。若於後時受生彼者。應當讀誦百八法門。讀誦茲已。方能受持彼一切法。不動如來之所

安立。一百八法門。本性我滅度後。若有菩薩摩訶薩。當生彼刹者。亦當讀誦一百八法門。及能受持一切法門。舍利弗。不動如來。應正等覺。善能攝受諸菩薩摩訶薩。佛雖滅度。其說法聲及莊嚴功德。與佛在世等無有異。復次舍利弗。彼不動如來。應正等覺。從身出火。

而自闍維舍利遺形皆作金色譬如佉彌羅
樹隨分斷處皆有_音卍字之文如來舍利亦

復如是復次舍利弗不動如來所有舍利分

分周圓表裏皆有吉祥之相相表之文卍舍

利弗譬如補羅迦樹隨解之處中表皆有吉

祥之文彼佛舍利亦復如是舍利弗彼國衆

生為供舍利起七寶塔遍滿三千大千世界

又以金色千葉蓮華而為供養其大千世界

即以塔華而為嚴飾復次舍利弗若諸菩薩

於不動佛國將滅度者臨壽終時曾不失念而

見如是種種瑞相或有菩薩見當生土無有

如來自方作佛或見彼有佛當即奉事或見

菩薩入於母胎或見菩薩被大甲冑或見捨
家趣於非家或見坐於道場降伏魔軍或見
菩薩證一切智智或見菩薩於某世界成等
正覺轉於法輪或有菩薩住虛空中自身漸
滅不遺少分譬然濕草煙氣上騰漸以消散
至于滅盡舍利弗是諸菩薩旣滅度已一切
天人備修供養復次舍利弗不動如來以大
涅槃般涅槃已正法住世經百千劫時舍利
弗白佛言世尊不動如來正法所住是何等
劫佛告舍利弗二十小劫以爲一劫彼住如
是百千劫數舍利弗正法滅已有大光明照
十方界地皆震動發大音聲然彼非天魔之

所能壞亦非如來及聲聞衆而自沉隱但由
彼時人少有聽聞多無欲樂能說法者皆悉
遠之既於正法寡聞轉增不信不信增長則
無精勤知法比丘自當退靜觀無樂欲不復
弘宣彼佛微言漸當隱沒

往生因緣品第六

尔時尊者舍利弗白佛言世尊菩薩摩訶薩
以何因緣善根之力於彼佛刹而得受生佛
告舍利弗若菩薩摩訶薩欲生妙喜世界者
應學不動如來往答行菩薩行發弘誓心願
生其國如是行願能作因緣生彼佛刹復次
舍利弗菩薩摩訶薩行檀波羅蜜時以此相

應善根迴向無上菩提願與不動如來共相
會遇舍利弗以此因緣當生彼界如是菩薩
摩訶薩行尸波羅蜜乃至般若波羅蜜亦復
如是復次舍利弗不動如來光明普照三千
大千佛之刹土願於來世當見此光證無上
覺因見光已成大菩提復以身光遍滿世界
舍利弗菩薩以是因緣當生彼土復次舍利
弗彼不動如來應正等覺諸聲聞衆無量無
邊願我當見見已起如是行證佛菩提證菩
提時亦有如是無量無數諸聲聞衆舍利弗
以是因緣故菩薩摩訶薩於彼佛刹而得受
生復次舍利弗彼佛刹中菩薩摩訶薩無量

無邊我當欲見此諸菩薩行禪定行願當隨
學與諸菩薩處處結集同學同乘同俱究竟
願當會遇欲求圓滿大慈悲者欲求菩提及
沙門者捨離二乘心者安住真實空性者於
佛如來一切智性及法僧名号念住相續者
舍利弗若善男子善女人聞是色類菩薩名
者於彼佛刹當得受生何況與般若若波羅蜜
相應善根迴向不動如來應正等覺舍利弗
以是因緣見人於彼佛土決定當生復次舍
利弗若菩薩摩訶薩願生彼佛刹者於東方
無量世界諸佛如來說微妙法及聲聞衆應
以其像隨念在前願我當證菩提說微妙法

及聲聞衆皆如彼佛舍利弗是諸菩薩應修
三種隨念善根願與一切衆生平等共習以
此善根迴向阿耨多羅三藐三菩提舍利弗
如是菩薩迴向善根無有限量假使一切衆
生各持一器量等虛空作如是言丈夫彼之
善根分與於我舍利弗此諸善根若有色相
給與衆生皆滿其器各各持去而彼善根亦
無窮盡以迴向阿耨多羅三藐三菩提無有
限量不可移轉故舍利弗彼三隨念所成迴
向一切種智以此善根三寶隨轉舍利弗若
有菩薩成此善根應知不墮一切惡趣而能
摧伏波旬及諸魔衆於彼佛刹隨樂受生乃

至南西北方四維上下亦復如是皆得隨願
受生是故菩薩摩訶薩於此隨念善根應當
積集彼積集已應迴向不動如來故於彼刹
當得受生復次舍利弗不動如來佛刹功德
廣大莊嚴於無量佛刹中彼皆無有是故菩
薩摩訶薩應當發如是心我以此善根願當
見彼土彼土莊嚴願當攝受亦願當見彼諸
菩薩舍利弗以此因緣菩薩當生彼國舍利
弗菩薩摩訶薩願生彼佛刹者應發增上樂
欲之心舍利弗若善男子善女人發增上心
我皆與記於彼佛刹而得受生舍利弗譬如
有城無有樓閣園林池沼亦無象馬遊行之

處彼城之王雖有力安處而城無樓閣諸功
德故則非莊嚴舍利弗我此佛刹亦復如是
無彼功德故則非嚴飾舍利弗我此刹中若
有如是功德莊嚴則如不動如來佛刹嚴勝
舍利弗若菩薩摩訶薩願當攝受清淨佛刹
者應如不動如來往修菩薩行植衆德本嚴
淨佛刹已及當如是攝取功德復次舍利弗
如我今時得阿耨多羅三藐三菩提已調伏
無量衆生於二乘道皆獲果證及我聲聞所
調伏者悉皆積聚方彼如來諸聲聞衆百分
不及一千分不及一百千分億百千分數分
筭分喻分鄔波尼殺曇分亦不及一何以故

由數無量故若言解脫則無有異且止斯事
舍利弗彼彌勒如來當出於世諸聲聞衆及
彼調伏所餘聲聞以方不動如來聲聞之數
不及之分如上應知舍利弗由彼如來於一
說法善能調伏無量有情然彼世尊之所攝
受無有能知其數量者舍利弗我之聲聞及
彌勒如來諸聲聞衆乃至賢劫諸佛世尊所
有聲聞及彼聲聞當所調伏餘聲聞衆彼皆
積聚比不動如來諸聲聞衆百分不及一乃
至鄒波尼殺曇分亦不及一何以故其數多
故解脫無異故時舍利弗白佛言世尊如我
解佛所說義者應知彼阿羅漢刹非愚夫刹

何以故彼佛刹中阿羅漢多故佛告舍利弗
如是如是如汝所說彼佛刹中多漏盡阿羅
漢故復次舍利弗此三千大千世界星宿數
量不如彼佛聲聞衆多由彼如來於一說法
無量有情得阿羅漢舍利弗此三千大千世
界星宿猶有數量彼一一會無量有情得阿
羅漢故諸會聲聞無有數量復次舍利弗彼
刹天人植衆善本餘界人天縱以天眼亦不
能見舍利弗假令餘界諸天及人往彼刹中
善男子善女人所盡其天眼亦不得見若人
聞此功德稱揚法門聞已受持讀誦通利彼
善男子等皆於不動如來往管行菩薩行時

皆已見聞是故聞此法門即得信心清淨舍利弗東方一切世界諸刹土中若菩薩乘人或聲聞乘人於此法門讀誦通利者其數甚多彼諸菩薩及聲聞人由願力故於不動刹中若已生現生當生唯除不退菩薩由彼菩薩於諸刹中當得阿耨多羅三藐三菩提故南西北方四維上下亦復如是舍利弗彼不動如來於妙喜世界及他方刹土在菩薩等乘中而為上首舍利弗若有善男子善女人聞不動如來功德法門善能受持讀誦通利願生彼刹者乃至命終不動如來常為護念不使諸魔及魔眷屬退轉其心舍利弗應知

是善男子或善女人乃至無上菩提無有退
轉之怖亦無水火刀杖惡獸毒蟲之所損害
亦不為人非人等之所怖畏何以故由不動
如來常加護念於彼佛刹當受生故舍利弗
譬如日輪雖復遙遠與閻浮提衆生而作光
明不動如來亦復如是雖在遙遠能與他界
諸菩薩衆而作光明舍利弗譬如比丘有天
眼者能見遠方諸善惡色不動如來雖在彼
刹餘世界中諸菩薩衆所有形顯等色皆悉
能見舍利弗又如比丘得心自在獲彼神通
波羅蜜者雖在遙遠了知一切有情之心平
動如來亦復如是能知餘界諸菩薩心舍利

佛言如來立證得天目身雖在遠能聞諸聲
不動如來亦復如是餘世界中所住衆生作
如是言我於彼刹願當生者彼佛皆聞舍利
弗如是色類善男子善女人所有姓名不動
如來皆悉了知若有受持讀誦通利此功德
法門者此諸人等皆爲不動如來之所知見
及已護念時舍利弗白佛言希有世尊乃至
彼佛世尊護念彼諸菩薩摩訶薩如是白已
佛告舍利弗如是如是如汝所言彼菩薩摩
訶薩如來之所護念何以故由護念菩薩故
一切衆生皆得護念舍利弗譬如刹利灌頂
大王多有倉廩盈儲穀豆嚴誠主司善令監

守何以故於饑饉世當濟羣生舍利弗是諸
菩薩於彼如來滅度之後當證無上正等菩
提能於正法饑饉之時作大豐稔如來亦復
如是善能覆護此諸菩薩舍利弗於此世界
有諸菩薩當聞不動如來功德法門能善受
持讀誦通利於彼佛刹願欲受生應知此人
得不退轉舍利弗若餘菩薩於此法門善能
受持讀誦通利為無量無數百千衆生開示
演說亦令諸有情如是植衆善本使當親近
無上菩提舍利弗若菩薩願速證無上菩提
者應當受持讀誦通利如是法門為諸衆生
開示演說何以故菩薩摩訶薩應如是演說

此功德門大智慧業當如是如是發起積集
彼諸人等由發起積集故於其現身諸漏當
盡舍利子是故聲聞乘者若聞彼法門應當
受持讀誦通利廣為衆生開示演說何以故
此善男子善女人由受持如是正法於其現
身當證無學舍利弗若有淨信男子女人於

此功德稱讚法門應當為他時時演說彼諸
人等不越兩生當於現身得盡諸漏復次舍
利弗此不動如來所有功德稱讚法門非愚
淺者之所能受其有智慧深廣方能受持舍
利弗彼善男子善女人當見諸佛於此功德
稱讚法門必當身得舍利弗譬言若無價寶珠

從海持來於意云何此無價寶何人先得舍利弗白佛言世尊有諸國王王子大臣此人先得佛告舍利弗彼佛功德法門亦復如是菩薩先得是諸菩薩當不退轉若聞此法必能受持讀誦通利爲無上菩提於真如性當勤修學舍利弗白佛言世尊若諸菩薩欲住不退地者聞此稱讚法門應當受持讀誦通利何以故菩薩摩訶薩住此法門於法性中當不退轉佛告舍利弗假使有人純以金寶滿閻浮提持用布施莫聞此法終亦不聞何以故此功德法非薄福衆生當執持故復次舍利弗若聲聞乘人聞此功德法門受持讀

誦爲無上菩提及真如相應故精勤修習彼
於後身當得成就或於二生補處或復三生
終不超過當成正覺彼若聞此稱讚法門讀
誦通利復爲無量百千衆生開示演說舍利
弗如轉輪王以先業感七寶現前不動如來
亦復如是以本願力我今說此功德法門舍
利弗若諸菩薩摩訶薩於此稱讚法門若已
聞若當聞者彼皆由不動如來往昔行菩薩
行時慈悲願力或當於賢劫中諸佛出尊之
所預聞開示此之法門如我於今演說開示
不增不減名數若干舍利弗是故菩薩摩訶
薩欲速證無上菩提者於此功德稱讚法門

應當受持讀誦通利爲他廣說復次舍利弗
若善男子善女人爲求此法門故於彼村落
城邑聽聞受持讀誦通利雖出家菩薩居白
衣家我說無過亦隨聽任何以故彼善男子
善女人於命終後欲令此法當不隱沒舍利
弗若彼村邑在於遙遠是諸菩薩亦當應往
及住彼中受持讀誦開示演說舍利弗彼善
男子善女人於已流布稱讚法門或於他人
有是經卷應可詣彼而書寫之彼人若有願
求汝當斷食或使經行若坐若立等應曲隨
教命書寫是經若於彼村求不能得應詣隣
境書寫受持讀誦通利復爲他人開示演說

若往餘方勤求不獲彼人應發如是誓心我
於無上菩提不應生於退轉之想由我已聞
不動如來法門名号是人於我欲為利益令
我聽聞舍利弗如是稱讚法門有能演說及
預聞者皆由如來威神之力時舍利弗白佛
言世尊如來滅後由誰威力而當得聞舍利
弗我滅度後由不動如來威神之力當復得
聞或由四大天王釋提桓因等當勤加護令
諸法師宣揚此法及彼菩薩本業成熟四天
王等威加策進令諸菩薩而得聽聞舍利弗
白佛言世尊如此法門能成就廣大功德佛
告舍利弗如是如是如汝所言舍利弗若於

國中雨雹為災非時霹靂及餘種種可怖之
事彼善男子善女人等應當專念不動如來
及稱名号是諸災害皆得消除由彼如來往
答弘濟百千諸龍解脫眾苦又由慈悲本願
誠諦不虛迴向善根要期圓滿故稱彼名号
憂患自消唯除有情宿業成熟舍利弗白佛
言世尊是諸菩薩現身欲證無上菩提者應
如不動如來往修願行佛告舍利弗如是如
是如汝所言舍利弗少有菩薩摩訶薩已能
如是具修淨刹及當淨修如不動如來者舍
利弗彼諸菩薩皆當證得阿耨多羅三藐三
菩提而於佛性及一切智攝受佛國悉皆同

等菩薩聲聞非無優劣而於解脫則無有異
尔時欲界諸天及梵眾天等皆向彼如來合
掌頂禮而三唱言南無不動如來應正等覺甚
爲希有又歸命此界釋迦牟尼如來應正等
覺善能說彼稱讚法門尔時欲界諸天以曼
陀羅華及諸天香以散佛上所散香華於虛
空中合而成蓋復以諸天華香遙散彼佛以
爲供養時天帝釋作如是念我此四眾及欲
界諸天皆欲見彼不動如來應正等覺尔時
世尊知彼釋天心之所念結跏趺坐安處虛
空是諸大眾以佛神力亦住空中皆遙見彼
妙喜世界不動如來及聲聞眾眾皆見已右

膝著地向不動如來應正等覺。爾時此界衆人皆作是念：豈非三十三天爲見彼佛而來集會禮拜供養？是時帝釋作如是念：彼界諸天以人相而住，我見彼諸人等服玩資具與彼諸天無少優劣。爾時世尊攝神通已，告天帝言：彼諸人民皆受天樂，汝應愛樂。是諸人等見彼如來及愛樂，彼受天資具者，彼諸衆生從餘世界命終以後，皆得往生不動佛刹。爾時舍利弗告帝釋言：汝見釋迦牟尼佛及不動如來，由此緣故，汝於此身得大善利。況汝已得過人之法，時天帝釋作如是念：彼諸衆生聞此法門，亦得善利。何況得生不動佛

刹刹時佛告天帝釋言彼菩薩乘人當生彼
佛刹者亦得善利何以故彼諸菩薩皆應得
住不退轉故若餘菩薩於其現身願生彼佛
國者應知皆是住不退轉佛說此法門時五
百比丘於無漏法心得解脫五千菩薩六千
比丘尼八千優婆塞十千優婆夷及欲界中
無量天子於彼佛刹皆願受生如來是時皆
與授記於彼佛刹當獲往生若餘有情當願
生者如來亦當與記生彼佛刹是時三千大
千世界六種震動所謂動遍動等遍動搖遍
搖等遍搖震遍震等遍震由此法門所加持
故佛說此經已舍利弗等及諸世間天人阿

脩羅軋闍婆迦樓羅緊那羅摩睺羅伽聞佛
所說皆大歡喜信受奉行

大寶積經卷第二十

師

金礦

反古猛

鑄鍊

音鍊

出字

上音萬經自出

相承

同上

窻聞

反上古

倉廩

反力審

盈儲

音除也貯也

饑饉

上音機

下音覲

穀不熟為饑菜不熟為饑也


策進

上初責以駢也

霹靂

上普擊反

下呂擊反



猪飼順良寄附

